

# INUIT ATAQATIGIIT INATSISARTUNI



UPA2026/121

Juunip 3-iat 2026

Paarma Lund Kreutzmann

## **Uummannami Upernavimmilu eqqakkanik ikuallaavimmik pilersitsisoqarsinnaanera pillugu apeqquteqaat aallaavigalugu oqallisissiatut siunnersuut.**

(Inatsisartunut ilaasortaq Knud Kleemann, Atassut)

Ajornartorsiummik pingaarutilimmik siunnersuummik saqqummiussinermut siunnersuuteqartumut qujanaq.

Inuit Ataqatigiinnit Uummannami, Upernavimmi taakkulu eqqaanni nunaqarfinni innuttaasut eqqakkanik passussinermut tunngatillugu misigisartagaannik aarleqquteqarneq paasillaarsinnaavarput. Kalaallit Nunaanni sumiluunniit eqqakkanik ajornartorsiutinik avatangiisinik, peqqissutsimik inuunerullu pitsaassusaanik sunniisunik misigisoqassanngilaq.

Peqatigisaanik aalajangikkatta suliani naliliinikkut ungasissumullu sammisunik aaqqiissutinik toqqammaveqarnissaat pingaaruteqarpoq. Ikuallaaviit minnerit avatangiisitigut illersorneqarsinnaasumik ingerlanneqarneraat ajornakusoorsinnaasoq, akuutissanillu soorlu dioxinimik peqqissutsimut innarliisunik aniatitsinissamut aarlerinaateqartoq, Naalackersuisut tikkuarpaat. Pissutsit tamakku isiginngitsuusaarsinnaanngilagut.

Taamaammat Uummannami Upernavimmilu ikuallaavinnik pilersitsisoqarnissaa kisimi matumani pineqanngilaq. Manna qanoq ililluta avannaani pitsaanagerusumik aalaakkaanagerusumillu eqqakkanik passussinermik qulakkeerinnissinnaanitsinnut tunngassuteqarneruvoq.

Eqqakkanut immikkoortoq pillugu Naalackersuisut kommuninik oqaloqatiginninnernik aallartitsisimanerat pitsaasuuvoq. Aaqqiissutissalli sorpiaat sulissutigineqarnersut, avannaani innuttaasut aamma ilisimasariaqarpaat. Siku, ungasissutsit naammassinnissinnaassutsilluunniit amigarnera pissutigalugu eqqakkanik ikuallaavinnut pioreersunut assartuisarneq ajornakusoorpat, ataatsimoorluta ilungersunartunut taakkununga aaqqiissutissarsioartariaqarpugut.

Inuit Ataqatigiinniit nunatsinni nunap immikkoortuisa tamarmik naligiimmik pineqarnissaat kissaatigaarput. Taamaammat avannaani pissutsit immikkuullarissut

# INUIT ATAQATIGIIT INATSISARTUNI



nuna tamakkerlugu aaqqiinernut ilanngullugit eqqarsaatigineqarnissaat pingaaruteqarpoq. Aaqqiissutit nunarput tamakkerlugu assigiittariaqanngillat, eqqakkanilli passussinerup pitsaaqatigiissuunissaata qulakkeernissaa isumagisariaqarparput.

Eqqakkat maanna eqqartortillugit ikuallaaviit eqqakkanillu assartuinerit kisiisa oqaluuserissanngikkivut isumaqarpunga. Peqatigisaanik eqqakkanik immikkoortiterineq atoqqiinerlu ilanngullugit oqaluuserisariaqarpagut.

Nunani avannarlerni piffinni amerlasuuni pisortat suliffeqarfiini, suliffeqarfinni inuinnaallu angerlarsimaffiini eqqakkanik immikkoortiterineq ullumikkut ulluinnarsiutaavoq. Taamaammat aamma Kalaallit Nunatsinni eqqakkanik immikkoortiterinermut tunngasumut, qanorlu nuna tamakkerlugu eqqakkanik immikkoortiterinerup eqqukkiartornissaanik aalajangertariaqartugut isumaqarpunga.